


嚴陵記略



丹徒戴氏皮布

977687

嚴陵記略



同治戊辰  
孟秋重刊





古之學者政事文章道出於一故曰有德者必有言兩漢循吏類皆深明經術內外合一書以道政事讀典謨之詞藹然忠厚可以見聖人之於民焉後世歧學於治而刑名商韓之說進其始非不小有徵驗而後刻剝削元氣暗傷霸術治民不旋踵而終敗昌黎致歎於施仁與暴之異效誠有見於天地之心焉魏晉以降言政之書在唐爲棠陰比事宋爲名臣言行錄元爲三事忠告明爲溫民母訓盛氏拙政編皇明經世文呻吟語編我

朝諸臣有于氏政書黃氏福惠全書陸氏蒞政記陳氏五種遺規汪氏學治臆說陸氏切問齋文鈔而近日我郡錢給諫撰良吏述補無錫鄒中丞編道齊正軌皆真本愛民之誠而著其張弛補救之法蓋天之愛民甚矣天生之而不思所以養之教之則民無適從而死於飢寒死於刑僇是不死於天而死於人是天心之所不忍也故天旣生民又生賢君師以生我民其設施條教卽天地之心之所寄焉戴澗鄰觀察以名孝廉宰浙游涉今職出典大郡我鄉士民能言其政一日讀其所著嚴陵記畧事皆徵實惻然有不菲其民之心又惜公生稍後不及與中丞給諫訂交然他日志吾郡官師賢父

母者非公而誰觀察籍潤州與我家兩松中丞同郡中丞撫  
閩多惠政林文忠之封公重之至取中丞少時所冒徐姓以  
名文忠觀察生同郡邑試取其遺書覽之以所心得著之於  
篇當更有進則是編猶爲嚆矢也同治五年秋日治下楊象  
濟謹書



嚴陵記畧

潤州戴槃澗鄰氏著

定嚴屬墾荒章程並招棚民開墾記

重築東西湖壩並開濬城內河道記

儲備倉穀記

製造水龍記

請發公帑重修嚴郡城垣記

請嚴郡採訪局展緩停止記

重修嚴郡文廟記

目錄

重修嚴郡武廟記

重修嚴郡城隍廟記

重修嚴州試館仍作書院月課士子記

重修嚴郡文昌祠兼興義學記

重修嚴子陵先生祠堂記

建嚴陵范公合祠記

重修嚴郡王公祠記

重修嚴郡忠義祠記

重修嚴郡節孝祠記

重修嚴郡養濟院記

重修嚴郡育嬰堂記

重修嚴郡清節堂記

重建嚴州府署記

目錄





定嚴屬墾荒章程並招棚民開墾記

戴不樂

浙省自兵燹後田畝久荒各市鎮悉成焦土遠近鄉村亦復人烟寥落連阡累陌一片荆榛辦理善後事宜墾荒其第一

要務也余蒞任後查嚴郡各屬田地荒蕪人民稀少較之他郡情形蹂躪更甚怒焉憂之今欲招墾必須外來之戶樂於耕種墾戶日多一日則荒田日少一日庶糧賦不至久懸無如外來墾戶由江西來者則有衢屬之荒田可耕由甯紹來者則有杭屬之荒田可耕惟嚴郡居中止有徽州一路徽嚴交界地方皆係荒產斷不肯舍此適彼惟查有棚民一項向來以種山爲業地方農民不與爲伍自咸豐十年後粵匪滋擾棚民僻處深山未受大害現較農民尚勝一籌昔日無田可種而不能不種山今日有田可種而能改種山爲種田田之出息究厚於山各棚民非不願種實不敢種須設法招之使種此余所以有棚民開墾之議也嚴郡收復以來迄今數載田旣久荒墾本較大種山之民聚族於斯其招墾也尚易他郡之民遷徙於斯其招墾也更難若非明定章程格外優恤難期踴躍從事非特他郡之民裹足不前卽棚民亦多疑畏竊恐荒田日久不墾皆成廢地何以使糧不虛懸哉今查



各屬田畝或業戶畏完錢糧不肯遽報或佃戶私自墾種不  
卽呈報其中更有因田畝墾熟假冒誣認甚則書差舞弊藉  
端勒索以至日久爭執種種弊端不一而足且支河又港種  
田者必資水利聞開墾各戶本地農民不准取水所有築堰  
等費又欲外來之墾戶承認不肯按已種田畝均攤是必嚴  
行禁止以廣招徠蓋弊既除而後利可興也余閱善後局頒  
發章程聲明各屬有不能強同之處應由地方官隨時隨地  
酌量稟辦以期盡美盡善余不敢謂所擬章程咸臻美善而  
因時利導因地制宜因人成事悉心斟酌謹列膚見四條如

左

一宜令隨墾隨報也本地荒田外來墾種各戶無論本籍  
寄籍須先報明認墾不准隱匿遲延近年來田畝荒蕪  
久墾本較大三年內如有原業主來認應分租息作爲墾  
本不准分租亦不准遽行收回俟承種之人稍得利息三  
年後再行退還其有情願來人佃種者悉聽自便報墾到  
縣不准勒索墾戶分文並准免完錢糧一年須以原報畝  
數爲憑三年內業主承認既不分租一年之後應完錢糧  
卽暫令墾戶照出倘非新墾之田佃戶照舊完租由業主



完糧不在此例其有私墾而不舉報者查出作私佔論庶  
隱匿不報之弊可除

一宜令墾戶三年後卽行執業也限定年分須照到縣報  
墾日期爲憑扣至三年方准呈辦三年後如無業主來認  
准墾種各戶作爲已業過戶完糧旣得利息復有恆產自  
必踴躍從事所有溝港取水本地農民不准阻止倘有築  
堰蓄水之事亦必按畝均攤毋令墾戶多出錢文庶墾戶  
樂從而日久爭執之風可息

一宜令原業主早爲呈報也荒田有人墾種如實係自外  
間回來者方准照數收回到籍三月內卽須稟報倘係在  
籍之戶不卽行報明延至日久俟田已墾熟再行呈報顯  
係有意取巧詢明地鄰卽將所種田畝罰半歸墾戶執業  
至於業主之親族不得混行爭執庶業主不敢久匿田畝  
可以逐次清釐

一宜嚴禁冒認也荒田墾熟後本籍奸民固有藉端假冒  
甚則衙門書差串出鄉民冒認藉端勒索其實有印契糧  
串可憑者自當退還如無確據必須本庄地保紳董代爲  
出結方准執業如有非業主前來冒認並憑空匿造假契

訊明情節嚴行懲辦衙門書差勾串勒索尤爲地方之害  
倘有此弊更應從重治罪庶墾戶無所疑畏田畝可以漸  
次耕種





重築東西湖壩並開濬城內河道記

戴 樂

地之有水如身之血脈貫通百骸一有壅塞病情立至然則水利可不講歟嚴郡龍山之水直注大江無門戶鎖鑰惟東西兩湖掖城左右西湖水由江家塘至後輪橋太平橋舍人橋出宋家湖而至東湖謂之玉帶水卽城內河道是也今者兩湖壩圯西湖水涸力不能及東湖城內太平橋之東淤塞不通其有關於水利也正非淺鮮余守嚴郡百廢具修日不暇給復請公帑以疏水道兩湖築壩旱蓄水洩城河一濬西可以達呂公橋東可以通丁江知人身之經絡有血脈爲之流通而後有益於民有益於官有益於

五

國也記云如得兩湖通一處卽時貴顯富民多其斯之謂歟夫人文不振由地脈不修此說未可盡非也余倡修壩通湖之議爲之動用帑項不以錙銖病民經始於丙寅孟夏告成於季秋三閱月而兩壩告竣數十年淤塞一旦遂通有志之士勉紹前徽將見人文蔚起咸曰兩湖毓秀之所致也是爲

記



天運靡常凶饑代有歷考史籍賑乏者亦多術矣大約不過發倉廩耳夫倉廩之發皆因有穀若或無之計將安出嚴郡介萬山之窟土堅而确上不受潤下不斥鹵雨則潦霽則稿下戶無餘粟中產不足伏臘仰給於鄰郡而日糴焉小歉則值倍他郡然商賈惟利是趨如能招而至焉則民猶免於萃不然招商曰無發廩曰無不幾束手待斃乎余自乙丑秋來守是土值洪水驟發之後舊存米穀散給一空前丁太守請發公帑爲地方積穀有志而未能舉辦余乃將捐局給發錢千串委員採辦其得穀八百三十石有奇丙寅夏旱城中缺米居民乏食余爲之發倉穀以濟之賤其價值以待新穀之登場而止然後知穀之有關於民食也大矣而儲倉穀於郡城尤不可不多爲之備余又見郡城之穀堆貯民房非久遠計更請以壩工未用之錢一千餘串改建預備倉又查嚴郡有給發各屬牛種未繳銀二千餘兩卽以應收之欸買儲倉穀多一石卽有一石之用此乃當務之急至於地方年穀順成再由各戶捐積從此而增造義倉分立社倉余猶望於後之守是土者推而廣之是爲記



余於五年秋交卸嚴州府事後稟請建造府倉並將金衢  
嚴三府各縣所借牛種銀兩每銀一兩完穀一石以實倉  
儲上憲俯允所請復又條陳各郡建一府倉每府積穀萬  
石以備兵荒之用至七年秋奉飭舉辦迨八年夏余重守  
斯郡始將嚴郡倉穀收齊諸足萬石又記



柔

製造水龍記

戴槃

救火之器古惟水袋唧筒順治初上海縣唐氏得水龍之制於倭人久而他處漸傳其制用之最善此水龍之所以行於各省也嚴郡自兵燹之後百事俱廢余自乙丑秋來守是郡下車之始首思禦災捍患詢之紳耆舊備水龍無一存者余心憂焉急欲造之而苦無良匠冬十二月杪祝融告警火災叠見余親至其地督率郡之人撲滅而城中無救火之器終無以防患於未然也適五年春親詣武林特捐廉製造水龍一具以備不虞其餘應用各器靡不悉備書曰有備無患正謂此也舊之習練此事者尚存二十餘人聚而演之乃擇於二月吉日就東湖左側馬賀橋祭畢迎設南周王廟安置以從郡人之請是爲記



請發公帑以修郡城記

戴 榮

乙丑夏靈雨兼旬洚流四發郡當其衝城廓鄉市滙爲巨浸城垣因之傾圯蔣方伯委員前來會同前丁太守查勘丈量統計四城周圍倒塌共五百七十三方興工修築費資甚鉅請於方伯由民間接畝集捐方伯以民情疾苦當此水災之後應徵錢糧

朝廷悉予蠲免不忍以城工之事下累吾民未允所請而此事遂息適余八月秋來守斯土周歷各城闔視工段坍塌甚多急思繕築力請於大府動給公帑大府准發錢五千串查

八

郡城周圍五里有餘門有六西南各二東北各一余乃構覓良匠分段估計共需工錢四千三百五十串有奇以外應用各料止需石灰錢六百餘串其餘磚不必取之於窰石不必採之於山度城內外之所有足敷修城之用是以所估錢數適符所准錢數上其事於各憲方擬擇日開工得觀厥成乃因去任而未竟其事余心歉甚然用項旣籌工段亦定後之守茲土者無難遵而行之余思城所以衛民衛民而不至於累民此則余之深心也是爲記

請嚴郡採訪局展緩停止記

戴槃

浙省自咸豐庚申年來疊遭兵燹各郡幾無完善之區其時官紳士民兵勇及婦女幼童殉難者誠不可以數計至同治三年武林克復後省城設立採訪總局並飭各府分設一局示以限期卽將殉難紳民男女等人等逐一採訪詳請旌卹昭忠節表貞烈也余於四年春權篆嚴郡知地當要衝粵匪擾害甚於他郡嚴之民人被害者亦多於他郡地方水患爲災人民未盡復業採訪一事若不寬其期而緩以查之恐忠義節孝湮沒者多無以頒鉅典而慰貞魂余心憫焉是年秋各郡奉文停止均卽撤局惟嚴州一郡獨請於大府展限一年仍飭各屬廣加採訪彙請旌表大府俯允所請前設郡局共採訪殉難男女得一千六百餘人自甲子九月至乙丑八月竣事又採得千餘人其中忠臣義士節婦貞女不能盡無遺漏而多訪一人卽彰一人之堅操多訪一年卽成一年之實政謂非守土者之責歟迨劉君接篆嚴陵遂援成案復請展限一載適余在省提調善後局務總理其事爲之轉稟於大府仍舊允行從此搜採之時月愈久而表揚之忠烈愈多矣

是爲記



重修嚴郡文廟記

戴槃

曩余出宰桐鄉逢丁祭躬親釋奠美富親見之星霜幾易而烽火遙來事平之後出守嚴州至則官廨民房胥成焦土惟聖宮巍然尙存然已十毀八九慨然曰事孰有大於是者乎孔子廟貌擬王者營建原不易予力請於大府動用公帑急召工匠數百人委員監督其自泮池內外圍墻傾圮者重修之自儀門而東廡西廡拆毀者重建之大成殿規模尙在而藻井與櫺星門向之有而廢者補之明倫堂增置後壁崇聖祠增設前門名宦鄉賢土地各祠新築墻垣餘如聖賢先儒各牌位一切祭器獻壇等無不周備以昭慎重閱四月而功始告成守土者爲一方興文教爲萬世存道學爲一日之官卽盡一日之事後之賢守朔望行香春秋致祭升堂猶聞絲竹之聲入室無復邱墟之感則予之於斯舉固樂其觀其成也是爲記

重修嚴郡武廟記

戴槃

嚴郡武廟有二一在東門內一在府學西今惟東門內廟貌猶存用急興修以昭誠敬竊惟帝之神靈浩氣亘古常存充塞無間歷代帝王古今士庶無不虔心崇奉婦人女孩子提之童一耳帝姓卽悚然改容如雷霆之震耳強梁桀驁之徒所至各廟殘燬靡遺獨帝廟存十之七以故棟宇墻垣規模尙在堪資修理則帝之正氣流行聲靈赫濯爲何如歟歲乙丑余來攝郡篆至卽躬拜帝像而廟模不壯懼無以肅觀瞻急爲之請於大府動用公帑整飭堂廡丹雘楹桷樸斲殿庭

十一

勳聖墻宇體制胥遵定例猗歟盛矣蓋乘其未壞而補苴之易爲力及其旣敗而創豎之難爲功有心者苟念今茲致力之維艱護而惜之嗣而葺之則茲之壯麗而巍煥者永新不敝豈不幸甚余有望於後之守茲土者共勉之是爲記



重修嚴郡城隍廟記

戴槃

城隍掌生靈之命而司禍福之權其有水旱昆蟲妖異疫癘之災城隍亦不得辭其責予守是郡以撫綏之責自任兼以燮理之責任城隍而任廟貌之褻陋非所以敬土尊神也特勸民間捐輸爲之重修一有水旱災爲民請命見民多收一斛麥曰此維神之賜多獲一區豆曰此仗神之力所以敬神者無微不至而年來水旱頻仍民不至大歎者厥功有在夫朝廷祠郡邑厲壇均以城隍主之而殷祝之以福善禍淫古之聖人神道設教卽此類也余自乙丑綰綬茲土載考郡志

三

知縣城隍先附祀於郡廟至明崇禎年間始建邑廟而郡邑遂分兩廟迄今數百年來遭此浩劫郡廟之焚燬無存幸邑廟猶在堪資修葺今廟貌重新均復舊制郡邑之城隍仍合爲一廟而並祀焉至於郡廟之基址尙在重建棟宇則又望郡之人於休養生息後勉力共成之也是爲記

重修嚴州試館仍作書院月課士子記 戴 槃

學校造就人才之地原不必歧試館書院而二之也嚴郡士風有明最盛商輅姚夔以勳德著洪堪何海以正直稱喬年子灼以忠節聞鄭侃孫瓊以經濟重至於

國朝廉明不阿如毛際可之爲推官方象璜之爲大理吏治通達如夏日昌之令海康詹惟聖之宰德平他如何士錦王雲鳳余廉徵等胥出身科甲膺民社之任而循聲卓著或曰是試館之所拔取或曰是書院之所栽培不知有書院卽有試館試館每歲學使舉行一次書院一月兩行考校考校之

志

法朔課則府縣輪流校其文藝品其次第有高下使士生廉恥心有獎賞使士生奮勉心扶輪大雅激勵風教莫重於是望課則聘文行兼優者主其事亦每月一課秉公閱藝定爲超特壹三等上之太守太守按次定賞仍下其事於山長使給諸生以宏獎勸法至良意至美也按嚴郡試館向在府前係明大司馬宋賢捐建制度宏敞士子頌德書院則在府學東乾隆年捐建嘉慶年重修亦分東西文場如試館例咸豐十一年間試館被燬無存而書院尙存門堂蔣方伯魏觀察及諸同官以及地方殷戶在庠諸生共集捐資得若干數前



太守丁經理其事添造屋宇草創已成未幾洪水驟發東西  
文場屋宇傾圮余自同治四年八月來守是土次年二月卽  
遇學使按臨四年歲考已經借書院爲試館余不敢不踵其  
事乃勸令在庠諸生捐貲修葺拓其規模有門有堂有樓有  
廡有厨庖寢漏之所學使按臨一月事畢仍作書院考課士  
子名仍其舊事不虛行不必以書院爲試館定爲永例而試  
館人才胥出之書院二者固並行不悖也復查書院經費向  
有田五六百畝租息作爲山長束修士子膏火之需自兵燹  
後荒廢者多成熟者少現查明一百五六十畝尙未能收租  
應用余每課膏火胥捐廉泉山長束修取之辦公經費然一  
時權宜之計所賴該地紳董與後之守是土者力加整頓務  
使舊制可以復興而善政垂諸不朽有厚望焉是爲記

齒

余前權篆嚴郡捐修試館作爲書院並捐廉以課士至八  
年夏重守是郡歷任因書院經費支絀膏伙無出課試寥  
寥余稟請於大憲在善舉經費項下每年提錢三百串以  
爲每月考課士子作正附課膏伙之用准如所請現在按  
月舉行並延掌教添設師課從此文風可以日上而士子  
得有膏伙亦不無小有裨益也至書院逐年所收田畝出

息三年歸併一科留作士子賓興之費又記



齋

息三年歸併一科留作士子賓興之費又記



重建嚴郡文昌祠兼興義學記

戴槃

嚴郡文昌祠舊在興仁門外兵燹後殿閣無存祀典遂廢身為民牧不力興文教曷以暢

皇仁余自守郡以來墜者修之廢者舉之動公帑者十之八捐廉泉者十之二今力將告竭若重請於大府當經費支絀之時必不能再發公帑然不建祠奉祀亦無以揚珠璧之彩而助日月之光查東門街義學房屋一所余愛其地潔淨改爲祀神之祠將公帑內所餘錢文爲之增其門屋修其堂宇廟貌煥然一新從此文治昌明而六睦之英才卽聚於斯至於義學仍設立祠內擇師訓蒙小子有造以冀成人有德異日由義學而入鄉學

國學未始非振興文教之一端也是爲記

重建嚴子陵先生祠堂記

戴 榮

自杭州東南溯江而上過富春渚至七里灘兩山之間有嚴子陵祠焉清風高節照耀江水曩常經其地瞻其道貌徘徊久之而不忍去宋范仲淹守嚴郡嘗爲子陵置義田立祠祀作歌以紀其德自是以後淳邑有方賊之亂富春有裘賊之亂是祠之或廢或興年日舛錯殆不可考

國朝嘗飭守土之官歲時修葺故祠得巋然長存自粵匪擾亂郡當其衝祠遂不保余以同治四年八月來守是土過七里灘心徬徨者累月聞魏觀察有志捐造前丁太守經理其

六

事半途功廢予慨然首先捐廉二十萬錢次集捐貲鳩工庀材復祠宇之舊觀續造客星樓祠內神像碑石動用器具洪纖畢備閱四月而功告成迺入山而求子陵之後得兩人焉一名國祿一名寶華兩人爲從父子相與爲依懼將無後而又奇窮蓋義產之失久矣余爲之請於大府就嚴郡鹽課耗項內歲提錢八十千文爲目前開墾山田費用嗣後修葺祠宇奉祀香火俾得永遠有資仍勉國祿等砥節礪行無墜先人道緒則余他日公車便訪重瞻道貌庶幾景仰之思與是江是山而俱永也所有先生道德事蹟前人言之詳矣余不



復贄是爲記

余前權篆嚴郡捐建嚴祠諭令嚴子陵先生後裔嚴國祿  
寶華叔姪二人看守祠堂奉祀香火又稟請在鹽耗項下  
每年提錢八十千文以爲祠中之用當諭嚴國祿等早爲  
完娶以繼絕祀乃至八年夏余重守是郡嚴國祿仍未聘  
娶復又助資以成其事至十里富春山道光年間嚴國祿  
曾賣三股之二與方文芹執業現據嚴國祿具稟到府又  
斷歸嚴國祿執業永作嚴祠之用不准再行買賣並札飭  
桐廬縣立案又記

建嚴陵范公合祠記

戴槃

子陵先生與范文正公時代不同出處不同而相同以道百世之下聞先生之風者頑夫廉薄夫敦聞文正之風者鄙夫寬懦夫有立志文正爲先生祠堂記曰微先生不能成光武之大微光武豈能遂先生之高余更續兩語曰微文正不能知先生之心微先生豈能動文正之慕余乃獨捐廉二十萬錢構屋宇三間大加修葺爲之立祠以祀焉因名之曰嚴陵范公合祠是爲記

余前權篆嚴郡據紳士柴望元等稟請有無主黃姓破屋

六

一所可以建祠如有原主回來另覓房屋歸伊居住余乃捐貲興工修造房屋計用大錢一百七十餘串通稟各憲在案繼有民人欲收此屋前任劉守置之不問房屋仍爲民所居此祠遂廢余於八年夏重守是郡諭飭原稟司事囑令住是屋者將修造之錢照數繳出另行建祠復又情願將此屋歸公仍爲嚴范合祠又記



重修嚴郡王公祠記

戴槃

余守嚴之明年夏旱率屬祈禱芒鞋徒步自朝至於日中晷雖勞不倦非不自惜也重民命也聞郡之東門街舊有昭應伯廟爲郡人禱雨之所靈異叠著民曰嗟今之太守因旱而禱禱而雨前之太守因旱而禱禱而不雨以身殉旱民不忘恩爰立廟祀予聞而愴然悲急思所以修之獨捐廉十萬錢因其舊址爲之整葺曩時規模宛然在目時而風譌雨順年穀豐登春秋致祭於斯脫有旱災就廟祈禱公之神靈必應之太守之幸闔郡之福胥在於是祠旣成都人士請記其大

九

畧焉按公姓王諱光鼎

國朝康熙三十五年蒞任有異政次年郡旱步禱龍山遭疾而卒民爲罷市立祠祀焉後有旱澇禱之輒應嘉慶二十五年知縣周興嶧奉撫臣題請

敕封昭應伯云是爲記

重建嚴郡忠義祠記

戴槃

國朝自定鼎以來忠義一祠設位不多蓋二百餘年來之昇平久矣咸豐十一年間浙東疊次告警郡城不守被害甚烈官斯土者皆能舍生取義視死如歸其沐浴於聖教者深也郡紳士民人亦頗知大義或不屈死或以戰亡忠肝毅魄脫不立祠以重其祀曷貴有守土之臣予攝郡篆甫蒞任謀置俎豆之區得節孝祠旁俞姓廢地一區給之以價迺獨捐廉三十五萬錢大興土木祠宇落成安之以位六邑忠義芳名大書特書於版並額曰見危授命自宋至有明以來其有功

字

地方之官各設一位尊禮之如初忠義祠居左節孝祠居右其中建造穿屋俾兩祠通聯一處春秋祭祀得以並行至於祭費則以嚴陵思范兩祠併爲一祠之用餘銀八兩改作忠義等祠祭銀嗣後永定爲例遵而行之則有司者之責也是爲記



重造嚴郡育嬰堂記

戴槃

嚴郡亂後人民稀少遂安人存十之七桐廬壽昌人存十之五淳安建德人存十之四分水人存十之二爲今之計莫要於招集流亡收養孤兒爲他日生聚之謀郡內育嬰堂向在北門城內自兵燹後屋宇被燬止存小樓空架兩間予爲守土官休養生息責任難辭迺獨捐廉一十五萬錢添造平屋重整舊樓翼城廂內外孤苦兒女收養於斯乳哺於斯餽粥於斯并長成亦於斯爲

國家廣恤孤之惠而宏錫類之仁典至鉅恩至渥也是爲記

三

余前權篆嚴郡建造育嬰堂所有堂內田畝止清出一百數十畝嗣奉吳學憲發銀一千兩劉太守又買成田一百四十餘畝逐年收租歸公應用每年出息除用項外止能餘錢一百數十千文開堂育嬰不敷應用歷任均未能舉辦余於同治八年夏重守是郡特先改設保嬰局並倡寫願捐每願一日一文官商共寫一千願零每月共寫計捐錢三十餘千文按年即可收錢三百餘千文現在貼養嬰孩爲數無多並飭司事將所有之錢先行添建房屋以爲日後開堂育嬰之舉又記

重修嚴郡清節堂記

戴槃

婦人不忍死其夫矢志不嫁白首冰霜誠足嘉也然或衣食不繼任其凍餒恐非保全名節之道我江南有恤嫠堂有恤嫠會至浙江則有清節之名嚴郡設立於北門城內其房屋建自何年造自何人均無稽考惟與育嬰堂合爲一區分爲兩所育嬰堂廢而清節堂尙存房屋規模甚爲寬敞予仍其舊獨捐廉五萬錢稍加修飾俾斯堂不至於傾塌存其名可  
以復其實也或曰經費不籌良法不久此舉難以遽行然余願居斯堂者之人少而不願居斯堂者之人多如能查明地方公產漸有收息得人經理亦不患善舉之不能復也是爲

記

音



重建嚴州府署記

戴槃

府治之建置由來舊矣明以前不可考自元改州爲府明洪武初始移今所坐龍山正脈以後增置堂廳亭館樓閣宏規鉅制甲於各郡按嚴州形勢據浙江之上遊當甌歙之孔道錦峯繡嶺山水之鄉故其建置府治也氣象雄濶控制六邑襟帶兩湖今雖烽火之餘其制度形勢猶可仿古爲之余於同治四年來守是土急欲營建以復舊觀惟念君子將營宮室宗廟爲先用是先修文武各廟暨文昌嚴范忠義節孝各祠凡茲工程已陸續告竣取前所請公帑商建府署而工程浩繁從平地而起廳事寢寢室置府庫造亭廨築大小週圍墻垣厥功甚鉅余乃鳩衆庀材量地測景擇於丙寅四月吉日開工自夏徂秋外而儀門內而重堂高樓規模悉備次第告成則余府治之重建正欲崇體制而壯觀瞻也至於堂以外科房未造堂以內旁屋未成則待後之守此土者經營以終其事焉是爲記

附刻巖郡各楹聯

關帝廟

其爲氣也至大至剛充塞乎天地  
人皆仰之不賞不怒感格於神明

文昌祠

朗耀星輝魁斗戴匡分位次

主持風教馨香俎豆薦神明

郡邑城隍合廟

赫聲濯靈祀於一郡一邑

彰善瘴惡降之百祥百殃

天后廟

生有異徵秉滄海澄清之氣

歿而靈顯濟乘舟危險之時

烏龍廟

百六十里峯勢周迴遂此地隱居求志

一千餘年神靈感應慰斯民望歲深心

巖子陵祠堂

惟巢由乃可與並駕



微光武不能成其高

嚴范合祠

得聖之清在流水高山士各有志

于今爲烈道盛德至善民不能忘

王公祠

爲禱雨而亡自昔神靈如在

幸烽烟已盡如今廟貌猶新

節義祠

各矢精忠一片忠忱昭日月

同明大義千秋義氣壯河山

節孝祠

節烈常昭其矢貞操如冰雪

孝思克永用崇祀典達馨香

府大堂

我到梅城正烽烟甫靖洪水初消因地制宜計十一月于

茲矣

民安葺屋當土木重興閭閻不擾愛人節用斯一千石之

職與

澗鄰觀察於同治乙丑歲八月出守嚴郡樹適於是年十月

奉選來治下司授親見公治嚴善政爲甚悉前甲子歲樹曾

奉委署嘉興府學故得聞公治桐之政亦最詳方公之宰桐

鄉也時值鄰省寇氛告警羽書旁午之時獨從容坐鎮不屑

以籌防爲能拳拳於學校井田諸大政取諸古法斷之自我

十餘年來諳練之老吏淹博之通儒無不嘆服公如神之治

其經術有如此者嘉興七縣漕務最稱難辦又該地鎗船奸

民易於滋事時當大旱各邑令束手無策公不動聲色隱捕

奸民置之於法冬間辦理漕務得宜首先全完爲諸邑創咸

得指臂之助其才畧有如此者昔諸葛稱龐士元非百里之

材梁公稱張柬之可大用之器樹以爲經濟之士無適不可

用之於一邑而一邑治展之於一郡而一郡亦治嚴郡古睦

州之地風俗向稱樸厚而公受任於兵燹之餘舉闔郡瘡痍

之衆不足當桐鄉一邑之民撫理孔艱莫此爲甚而公以爲

政舉大綱其餘自從容就理故其爲政也招集流亡肅蠲徵

賦如黃霸之爲潁川令勞來不絕焉募民墾田籌儲倉穀

冀遂之爲渤海守勸農爲大焉以崇祀典建修各壇廟如韓

公在潮州遣官祭瀆而雷雨效靈焉以振文教飭修各書院

公在潮州遣官祭瀆而雷雨效靈焉以振文教飭修各書院



義學如蘇公倅杭州登樓賦詩而湖山增色焉至若荆公築  
四明之隄湯守開三江之閘而公之滌東西兩湖並城內河  
道政相仿也河南題明道之碑峴山墮羊公之淚而公之建  
嚴陵祠與嚴范合祠德相類也他如鐵筆表五人之墓梅花  
題雙節之名而公之建忠義節孝各祠事甫定亂而表彰尤  
多也英皇流湘水之音杵曰存趙宗之後而公之修清節堂  
暨育嬰堂恩推孤寡而籌畫尤深也凡此治功文吏能爲之  
乎俗吏能爲之乎必如歐陽公蓄道德而能文章者爲之惜  
公車敦迫設施猶有未竟之勳父老莫慰攀留之願計守郡

跋

二

以至去任時祇十一月耳嚴郡士民蒙再造之恩晉千秋之  
祝試館各祠爲之設長生祿位祝公壽考而樹以一介微員  
疊荷裁成用敢不辭僭越之咎舉共聞共見者謹述一二以  
傳其大畧至於闡揚盛德表著宏功非樹之淺見寡聞所敢  
贊一辭也同治五年歲次丙寅八月錢塘謝寶樹謹跋



文嘗讀史至宋范文正公傳知其以天下爲己任濟世安民之念隨地而存故歷任州郡無不展布經猷兼施教養卓然有政績可傳不特邠慶二州生祠畫像也卽其典領睦州興學校尊道德尤克育人材而維世教此後人所以建思范之亭也文爲諸生時聞今世有戴公者其人深明經術爲政如古良吏由縣令洊陟府道所至除害興利善政具舉皆務有益於民久已仰而企之惟恐不得一見己巳七月奉選來嚴司府學篆欣幸爲公屬吏晉謁之後蒙賜示所著宦游記畧受而讀之益信

公本經學爲經濟以實心行實事而

跋

三

其在嚴郡所修舉者一二可徵諸目見近復培植士子按月課試添給膏火士林鼓舞雖古賢牧何以加茲抑文重有感者始祖子陵公祠堂構自有宋范公遭兵燹而盡燬賴

公捐廉重建復祠宇舊觀併爲籌欸求後裔以奉祀事爲久

遠計使吾祖高節依然照耀山水卽此尊道與興學二端

激勵風教不誠與范公後先輝映哉文觀公之政治服

公之勳德而知公之福祿正未可量也爰樂書於記畧後

同治九年庚午孟春餘姚嚴蔚文



80.8

